

PERIUDHA ANTIKE

Periudha antike në Shqipëri fillon në gjysmën e dytë të shek. VII par Kr., me themelimin e kolonive helene në bregdetin e Adriatikut (Dyrrahu, Apollonia, Orikumi etj.) dhe krijimin e qendrave protoqytetare ilire (Margëlliçi, Klosi, Dorëzi, etj.). Ajo zgjat deri në fund të shek. VI mb. Kr., kur si rrjedhim i dyndjeve barbare, shkatërrohet modeli antik i qytetërimit, i bazuar në centralizimin politik, autonominë ekonomike të qyteteve dhe politeizmin.

Territori, ku gjendet sot Shqipëria, njohu gjatë kësaj periudhe forma të ndryshme qeverisje politike, siç ishin mbretëritë ilire, bashkësitë qytetare e kolonitë qytet-shtete gjatë shek. VI-I para Kr., pastaj pushtimin romak dhe administratën provinciale, duke filluar nga 229 para Kr. dhe, së fundi, administratën bizantine në Perandorinë e Lindjes, pas ndarjes së saj në vitin 395 mb.Kr. Këto ndryshime politike janë reflektuar në përzierjen e kulturave dhe në shumëllojshmërinë e monumenteve antike në Shqipëri.

Nga kjo periudhë njihen tipe të ndryshme banesash (në Apolloni, Antigone etj.), ndërtime shoqërore, si shëtitore (në Apolloni, Dimal, Butrint etj.), teatro (në Butrint, Bylis etj.), tempuj (në Apolloni, Butrint etj.), sisteme urbanistike (në Antigone etj.) dhe mure rrethuese ose fortifikime (në Lezhë, Himarë, Bylis, Butrint etj.).


Një zhvillim të madh mori gjatë kësaj periudhe dhe arti, cili përfaqësohet me pikturën e vazove dhe enëve të përdorimit të përditshëm, skulpturën dekorative e arkitektonike dhe, në menyërë të veçantë, me skulpturën e rrumbullaktë, me shtrimin e dyshemeve me mozaikë polikromë etj. Shumë vepra arti gjenden të ekspozuara në muzetë kryesore qendrore të vendit, në Tiranë, Durrës etj. ose të ngritura në qendrat arkeologjike, Apolloni, Butrint etj.




Foinike (Finik)



Orikum



Poseidoni, bronc. Antigone



Dea e Butrintit

1. APOLLONIA

VENDODHJA DHE PEISAZHI GJEOGRAFIK

Apollonia ndodhet 10 km larg qytetit të Fierit. Kodra mbi të cilën ngrihej qyteti antik bën pjesë në vargun e malësive të Mallakastrës, që zgjaten në drejtim të veri- perëndimit për nga deti, por shkrihen në fushë shumë kilometra para se të arrijnë brigjet e Adriatikut. Megjithëse Apollonia ndodhet 8 km afër bregut të detit, ajo kishte një port që e lidhte me Adriatikon nëpërmjet lumit të Vjosës, i cili në atë kohë rridhte pranë qytetit dhe i lejonte anijet të ankoroheshin vetëm rreth 2 km larg mureve të tij.

HISTORIA

Apollonia u themelua në vitin 588 para Kr. nga kolonë të ardhur nga Korkyra dhe Korinhi. Në vitin 314 para Kr. qyteti rrethohet nga mbreti ilir Glaukia, i cili bëri një traktat paqe me të. Nuk dihet nëse Glaukia arriti të pushtojë qytetin. Po atë vit, Apollonia u pushtua nga mbreti i Maqedonisë, Kasandri, i cili vendosi aty një garnizon ushtarak. Dy vjet më vonë më 312 para Kr. në qytet shpërthen një kryengritje që solli si rezultat largimin e trupave maqedonase. Më vonë qyteti bie nën zotërimin e Pirros së Epirit, deri në vitin 272 para Kr., pas vdekjes së tij. Megjithëse romakët ishin të pranishëm në Apolloni, ata e pushtuan përfundimisht qytetin në vitin 200 para Kr. Në vitin 49 – 48 para Kr. Apollonia bëhet arenë e luftës civile midis Cezarit dhe Pompeut. Augusti, që studioje për oratori në Apolloni dhe e cila e ndihmoi atë për të marrë pushtetin, i dha qytetit autonominë, ndryshe nga qytetet e tjera të rëndësishme në territorin e sotëm të Shqipërisë, si Shkodra, Butrinti, Dyrrahu etj., të cilat në peridhën e tij u kthyen në koloni romake. Apollonia del në hartat romake të rrugëve deri në shek. e V-të pas Kr., ndërsa Hierokli e përmend si një nga 8 qytetet kryesore të Epirit të Ri në shek. VI-të, por në fakt në këtë periudhë, Apollonia kishte rënë dhe vetëm fama e saj e dikurshme e bën që të përmendet. Shkak e rënies së Apollonisë përveç rrezikut të sulmeve barbare duhet të ketë qenë ndryshimi i shtratit të Vjosës, që mund të ketë ndodhur rreth shek. të III-të pas Kr., duke e lënë qytetin pa portin e tij. Apollonia mbetet edhe për disa kohë si qendër peshkopate deri në shek. e V-të, ndërsa në shek. e VI-të pas Kr. edhe qendra peshkopate shpërngulet në Bylis. Pas kësaj periudhe Apollonia nuk përmendet më në burimet historike.

FORTIFIKIMET

Qyteti i Apollonisë zinte një sipërfaqe prej 130 ha. Vetëm nekropoli i tij zë një sipërfaqe prej 50 ha. Muri i jashtëm i qytetit kishte një gjatësi prej 4500 m, ndërsa brenda tij konstatohen 3 radhë muresh ndarëse. Nga gërmimet arkeologjike, si dhe nga sondazhet e bëra në periudha të ndryshme, duke filluar që nga fillimi i shek. XX-të, është konstatuar se në periudhën helenistike ka pasur një rindërtim masiv të mureve mbrojtëse. Kjo periudhë përkon edhe me kohën e lulëzimit më të madh të qytetit kur u ndërtuan mjaft nga monumentet e tij më të rëndësishme. Muret janë ndërtuar pjesërisht me gurë dhe pjesërisht me tulla. Me blloqe gurësh të skuadruar, të punuar me kujdes, të vendosura në rreshta të rregullta, me lartësi mesatare prej 0.4 m dhe gjatësi 0.6 m, është ndërtuar vetëm pjesa e poshtme e mureve. Trashësia e tyre është rreth 2.4 m. Muret prej guri formojnë një xokol të shkallëzuar për shkak të terrenit të pjerrët, që arrin diku në lartësinë deri në 3.5 m dhe në raste të tjera 1.5 – 1 m. Pjesa e sipërme e tyre është ndërtuar me tulla me

përmasa 0.38 X 0.38 X 0.08 m të lidhura me një shtresë të hollë balte. Në pjesë të rindërtuara të këtij muri, ndoshta në periudhën romake, tullat janë lidhur me llaç gëlqereje. Qeramika e gjetur gjatë gërmimeve të murit nuk shkon më herët se shek. IV-t para Kr. Duke gjykuar edhe nga teknika e ndërtimit, këta mure mund të jenë ndërtuar rreth fundit të shek. të IV para Kr.

Një mur i vonë, i cili lë jashtë 1/3 e qytetit, është ndërtuar kur ky i fundit kishte rënë nga ana ekonomike. Në këtë mur janë përdorur si spolie, gurë të murit të vjetër, fragmente arkitektonike dhe brenda tij është gjetur edhe një statujë e fundit të shek. III-të. Ky mur duhet të jetë ndërtuar në shek. IV-t për mbrojtjen e qytetit nga sulmet gote. Në të njëjtën kohë u riparuan edhe pjesë të murit jugor të qytetit që ishte braktisur deri në atë periudhë.

Gurët për ndërtimin e mureve antike janë sjellë me anije nga malet e Karaburunit. Muri kishte kthesa të shumta drejtkëndëshe, më rrallë kulla drejtkëndëshe dhe rrethore, hyrje të vogla për manovrimin e trupave në rast rrethimi, si dhe porta kryesore për qytetin. Një nga portat e mëdha, në anën veri-perëndimore, është vendosur në anë të një kthese muri dhe mbrohej edhe nga një kullë katërkëndëshe, që projektohej 11m nga muri rrethues. Korridori i hyrjes i shtruar me pllaka guri ishte 6.5 m i gjatë dhe 3.5 . i gjerë dhe mbyllej nga dy porta. Në shtresën e tij prej guri dallohen gjurmët e rrotave të qereve. Prapa murit kalonte një rrugë 6 m e gjerë për manovrimin e trupave mbrojtëse. Brenda murit ishin ndërtuar stera uji për rojet. Njëra prej tyre, në formë gjysmë cilindrike kishte një diametër prej 4.5 m dhe thellësi 8 m.

MONUMENTET

Stoa

Stoa zë një vend qendror në qytetin e Apollonisë, nga ku hapej një pamje e bukur e qytetit, fushës që shtrihej para tij e deri në bregdet. Ajo është ndërtuar mbi një shesh të vogël rrëzë akropolit, i cili qëndron në lartësi relativisht më të madhe nga pjesa tjetër e qytetit dhe nuk ka asnjë pengesë përpara për të soditur peisazhin piktoresk të Apollonisë. Nga stoa ruhen një sërë nikesh gjysmë rrethore, të mbuluara me çerek kupolash sferike që i mbështeten shpatit të kodrës, si dhe bazamentet e dy radhë kolonave që mbanin çatinë. Niket janë ndërtuar me blloqe gurësh drejtkëndësh të punuar rrafsh. Kolonat e rreshtit të parë kanë qenë tetëkëndëshe, ndërsa kolonat e rreshtit të dytë janë trajtuar në formë pilastri me pjesën e përparme me kanelyra. Kapitelet e tyre janë jonike. Në niket e murit fundor vendoseshin shtatore mermeri. Stoa e Apollonisë duhet të jetë ndërtuar në periudhën helenistike, ndoshta në shek. III para Kr.

Teatri

Apollonia ka teatrin më të madh që është zbuluar deri tani në qytet antike. Ai ndodhet në shpatin verior të kodrës së qytetit. Nga teatri janë zbuluar një pjesë e skenës, e cila e ka pasur ballin të punuar sipas stilit me kolona dhe kanelyra dhe me një frizë me triglife dhe metope. Ndenjëset e tij janë 0.40m të larta dhe 0.75 – 0.85 m të gjera. Gurët e teatrit janë grabitur prej kohësh, por ruhet forma e tij në terren si dhe një pjesë e elementeve përbërëse që i përmendëm më sipër.

Tempujt

Në Apolloni ruhen gjurmët e njërit nga tempujt më të hershëm, ai i Artemisit. Ai ruhej në pjesën më të lartë të qytetit. Prej tempullit ruhet një pjesë e mureve perimetrale dhe antamblëmenti. Tempulli ka qenë i

orderit dorik. Nga frizi i tij ruhet një fragment, që paraqet tre luftëtarë duke u përgatitur për t'u ndeshur me një amazonë. Mënyra e punimit të frizit e datojnë tempullin në periudhën arkaike në shek. VI-V para Kr. Nga gjurmët kuptohet se frizi, antefikset dhe simat kanë qenë të ngjyrosura.

Një tempull tjetër është ai i quajtur tempulli i Shtyllasit, mbasi prej tij ruhet vetëm njëra nga shtyllat. Prej tij ka marrë emrin dhe fshati Shtyllas që ndodhet pranë. Deri nga mesi i shek. XIX gjurmët planimetrike të tempullit ruheshim më qartë, aq sa mund të bëhej një rikonstruksion imagjinar i tij. Ai ngrihej mbi një platformë (stilobat) të rrethuar prej një shkallareje me tre këmbë shkallë (stereobati). Në qendër gjendej ambienti kryesor me altarin dhe naosi me planimetri drejtkëndëshe me përmasa 22x10,5 m. Në ballë, ku gjendej dhe hyrja, naosi paraprihej nga pronaosi, i cili kufizohej në të dy krahët nga antet dhe kishte katër kolona në ballë. Naosi dhe pronaosi rrethoheshin nga një portik me kolona. Në anët e gjata gjendeshin 11 dhe në të ngushtat nga 6 kolona të tipit dorik. Lartësia e kolonës së mbetur arrin lartësinë prej 6,60 m dhe ka një trashësi prej 1,40 m. Përmasat e tempullit në anën e jashtme të stilobatit arrijnë në 27X44m.

Fontana

Furnizimi me ujë i qyteteve antike ka qenë një problem i përhershëm. Për këtë shfrytëzoheshin burimet natyrore brenda rrethimeve, sterat që grumbullonin ujin e shiut, si edhe pusët. Përveç shfrytëzimit të puseve, për furnizimin me ujë të qytetit u ndërtua dhe një vepër monumentale, e veçantë në llojin e vet, e cila njihet si Fontana e Apollonisë.

Fontana gjendet brenda mureve të qytetit, në veriperëndim të akropolit.

E ndërtuar në shek. III-II para Kr., ajo përveçse krijonte një rezervë të përhershme uji, i shtonte qytetit edhe një monument që e hijeshonte atë. Fontana është ndërtuar në fund të shpatit të një kodre dhe përbëhet nga elemente arkitektonike funksionale. Në mesin e pjerrësisë së kodrës ishte ndërtuar një mur pendë, me gjatësi 70m dhe lartësi 1.60m, që shërbente për grumbullimin e ujërave të burimeve dhe shirave që vinin nga pjesa e sipërme e kodrës. Muri pendë ndodhet 17m larg nga baseni i mbledhjes së ujërave. Ai e përcillte ujin në pesë kanale që zbrisnin deri në basen përgjatë shpatit të kodrës. Kanalet ishin të veshura me blloqe gurësh të punuara. Kanalet ishin të shkallëzuara në përshtatje me pjerrësinë e terrenit dhe, njëkohësisht, shmangte rrjedhjen e vrullshme të ujit. Kanalet që ndiqnin pjerrësinë e shpatit përfundonin në një kanal tjetër gjatësor, i cili mbrohej nga një mur 40m i gjatë, që shërbente në pjesën qendrore si faqe e basenit dhe, në anët, si mur terracimi për shpatin e pjerrët të kodrës. Për ruajtjen e pastërtisë së ujit, si kanalet e tërthorta ashtu edhe kanali gjatësor ishin mbuluar me pllaka guri, të cilat ruhen vetëm pjesërisht. Ng akanali gjatësor uji derdhej në basen nëpërmjet disa hapësirave të lëna për këtë qëllim. Baseni ka një kapacitet mbajtës prej 27m³ ujë. Në një fazë të dytë baseni u nda me një mur tërthor në dy pjesë, kështu që uji pasi linte llumin në pjesën e pasme, derdhej mbi murin ndarës duke mbushur pjesën e përparme të tij. Para basenit ndodhej një korridor, në të cilin të çonin tre këmbë shkallë dhe që kufizohej në ballin e tij nga dy pilastra anësore dhe pesë kolona të orderit dorik.

Rrugët dhe banesat

Në Apolloni si rezultat i gërmimeve arkeologjike, njihet më mirë një nga rrugët e saj kryesore. Rruga përshkonte si duket njërën nga hyrjet kryesore të qytetit në pjesën fushore të tij dhe drejtohej nga Shëtitorja

(stoa). Prej saj janë zbuluar dy trakte me një gjatësi të përgjithshme prej 450 m dhe është datuar në shek. III para Kr. Gjerësia e kësaj rruge, si edhe e rrugëve të tjera kryesore të këtij qyteti, të njohura pjesërisht, është 6-6,20 m. Traseja është e shtruar me zhavorr të imët të ngjeshur, me një trashësi prej 60 cm, ndërsa në anët e saj janë ndërtuara kuneta me seksion trapezoidal për kullimin e ujërave sipërfaqësorë, të veshura me pllaka guri. Për kalimin e kunetave në kohë me shi, shërbenin urëza guri, të harkuara në pjesën e poshtme, të vendosura pranë hyrjeve të banesave. Për të eliminuar shpëlarjen e shtresave nga shirat, në vendet ku rruga është e pjerrët, janë ndërtuar pragje tërthore prej blloqesh guri, rreth çdo 3 m.

Banesat janë të tipit peristil, me oborr qendror të rrethuar me kolonadë. Një banesë e gjërmuar në Apolloni, që i takon shek. III-II para Kr., ngrihet mbi themele të vjetra, që kanë ndikuar në formulimin e saj arkitektonik. Banesa me përmasa 30x12,5m, orientohej me dy anët e saj të ngushta ndërmjet dy rrugëve paralele. Hyrja ndodhet nga ana e rrugës. Korridoret komunikojnë me të gjitha ambientet kryesore, duke formuar bërthamën ndërlidhëse të banesës. Ambientet e familjes me ambientet e shërbimit janë të ndara nga njëra tjetra.

Në periudhën romake përhapet banesa me atrium, në cilat dyshemetë e shumicës së dhomave të shtresave të pasura, ishin të shtruara me mozaikë. Mozaikët paraqesin kompozime me motive gjeometrike, floreale dhe mitologjike dhe i takojnë periudhës pas shek. II. Midis mozaikëve të Apollonisë vlera të mëdha artistike ka mozaiku që paraqet luftën me amazonat, që i përket një ndërtese termale, si dhe mozaiku që paraqet Pentensilean, mbretëreshën e amazonave, duke dhënë shpirt në duart e Akilit, i cili shpreh dhimbjen për mbretëreshën që e vrau.

Monumenti i Agonotetëve (Buleuterioni)

Monumenti i Agonoteteve është ndërtesa ku mbledhej këshilli i qytetit. Është ndërtuar në shek II dhe ndodhet në qendër të qytetit. Monumenti ka përmasa 14,4x19,20 m dhe përbëhet nga portiku dhe salla. Në sallë veçohen vestibuli, orkestra dhe shkallarja. Shkallarja, në formë patkoi, ka pasur 10 rreshta të ndërtuara me tulla dhe të veshura me pllaka mermeri. Muret e ndërtesës mbështeten mbi themele guri dhe janë ndërtuar me muraturë të derdhur midis dy paretesh tullash trekëndëshe. Ndryshe nga pjesët e tjera, fasada kryesore, që përbëhet nga portiku, është punuar me blloqe guri. Portiku kufizohet nga antet, dy pilastra anësore dhe nga katër kolona mermeri me lartësi 7m, që përfundonin me kapitële korintike. Arkitrau, i cili është punuar në një bllok me frizën, ndahet në tre breza nga shirita perlash dhe ovaresh, mbi të cilët është gdhendur mbishkrimi votiv. Frontoni është i thjeshtë, pa zbukurime, ndërsa korniza ka profil të theksuar me dekor të pasur. Mbishkrimi votiv i incizuar në arkitraun dhe kornizën e monumentit, na bën të ditur se kjo ndërtesë u ngrit prej Kuint Prokulit pretor, agonotet dhe kryepriфт, në kujtim të vëllait të tij që ishte gjithashtu agonotet. Mbishkrimi përmend gjithashtu se me rastin e inaugurimit të këtij monumenti u ndeshën 25 çifte gladiatorësh.

Odeoni.

Odeoni ndodhet në afërsi të monumentit të Agonotetëve, thajse përballë fasadës kryesore të tij. Shkallarja e odeonit përbëhet nga 13 rreshta që ndjekin njëri tjetrin në formën e një segmenti rrethi, duke iu brendashkuar një ndërtimi katërkëndësh, të ndërtuar me tulla. Kapaciteti i odeonit ishte për rreth 400

spektatorë. Ai mbulohej me çati druri, e cila mbështetej në muret anësore dhe në një sërë shtyllash druri që përshkonin mesin e sallës. Ndërtesa kishte tre hyrje: një balllore dhe dy anësore që qëndronin përballë njëra tjetrës dhe të nxirrnin në skenë. Nga gjurmët e pakta që janë ruajtur del se odeoni ka qenë një ndërtesë shumë luksoze e me dekor të pasur. Për veshjet e shkallëve është përdorur mermer i bardhë, ndërsa për dyshemenë e orkestrës mermer shumëngjyrësh. Muret ishin të zbukuruar me afreske. Odeoni është ndërtuar pothuajse në të njëjtën kohë me monumentin e Agonotetëve.

HISTORIKU I GËRMIMEVE ARKEOLOGJIKE

Pas disa sondazheve të kryera në periudhën e Luftës së Parë Botërore nga arkeologu C. Praschniker, gërmimet arkeologjike sistematike filluan në Apolloni në vitin 1924 nga një mision arkeologjik francez, të drejtuar nga L. Rey. Në vitet 1930-1938 u zbulua qendra e qytetit, monumentet e Agonotetëve, odeoni, biblioteka etj. Në vitin 1948 u krye ekspedita e parë arkeologjike shqiptare e kryesuar nga Hasan Ceka dhe Skënder Anamali. Gërmimet kanë vazhduar deri në ditët e sotme duke zbuluar monumente të rëndësishme, si muri ballor i portikut, stoas, odeoni, biblioteka pjesë të murit rrethues të qytetit, teatri, fontana, banesa banimi e tj.

LITETRATURA

Praschniker, C., Schober, A., *Archäologische Forschungen in Albanien und Montenegro*, Wien 1919

Ceka, H., “Mbi historikun e kërkimeve dhe gërmimeve arkeologjike në Apolloni”, *Buletin i Universitetit Shtetëror të Tiranës, Seria Shkencat Shoqërore* 4, 1958

Ceka, H., “Muri rrethues i Apollonisë”, *Buletin i Universitetit Shtetëror të Tiranës, Seria Shkencat Shoqëror* 3, 1963

Ceka, H., “Fontana e Apollonisë”, *Konferenca II e studimeve albanologjike, vëll. II*, Tiranë 1969

Ceka, N., *Apollonia e Ilirisë*, Tiranë 1982


Baçe, A., Ceka, N., “Shëtitoret e periudhës qytetare ilire”, *Monumentet* 2, 1981

Zheku, K., “Punimet e restaurimit në Fontanën e Apollonisë”, *Monumente të Kulturës në Shqipëri*, Tiranë 1975, 1


Zheku, K., “Rishtyllëzimi i pamjes kryesore të monumentit të Agonotetëve në Apolloni”, *Monumentet* (18), 1979

Karaiskaj, Gj., *5000 vjet fortifikime në Shqipëri*, Tiranë 1981

Karaiskaj, Gj., “Befestigte illyrische Bergsiedlungen, griechische Handelskolonien und frühe stadtartige Siedlungen in Albanien”, *Die Illyrer*, Haugsdorf, 2004.



Portë hyrëse



Stoa e qytetit




Obelisku i qytetit




Odeoni



Monumenti i Agonoteteve



Fontana



Fragment mozaiku



Beteja e Akilit, mozaik

2. BUTRINTI

VENDODHJA DHE PEISAZHI GJEOGRAFIK

Butrinti shtrihet në jug të gadishullit të Ksamilit, i cili ndahet nga ishulli i Korfuzit nga kanali me të njëjtin emër. Ai ndodhet pikërisht në pjesën më të ngushtë të këtij kanali që nuk i kalon dy milje detare. Gadishulli i Ksamilit fillon disa kilometra në jug të Sarandës dhe laget nga perëndimi nga deti Jon, nga lindja prej liqenit të Butrintit (i njohur në kohën antike me emrin Pelodes) dhe nga jugu prej kanalit natyror të Vivarit, i cili lidh liqenin e Butrintit me detin Jon.

Rrënojat e qytetit antiko- mesjetar ndodhen mbi një kodër jo fort të lartë që shënon ekstremin jugor të gadishullit. Kodra përveç mbrojtjes që i sigurojnë ujërat e liqenit dhe të kanalit të Vivarit, plotësohet dhe nga shkëmbinj të thepisur që zenë sidomos anën jugore të saj. I vetmi rrip toke që e lidh territorin ku shtrihet qyteti i Butrintit, me pjesën tjetër të tokës ndodhet nga perëndimi dhe zë vetëm një të katërtën e perimetrit të qytetit.

Butrinti paraqet një kombinim të rrallë të ambientit natyror tërheqës me rrënojën arkeologjike. Bimësia e rrallë dhe pasazhi magjik të fusin në atmosferën e kohërave heroike. Nga kodra e Butrintit hapet një pamje e gjerë piktoreske, me detin Jon nga perëndimi, ku pamja mbyllet nga ishulli i Korfuzit, me kanalin e Vivarit dhe fushën e Xarës (Kestrina antike) nga jugu, ku spikat në horizont vargu tërthor i kodrave që përfundojnë në det në kepin e Stilos dhe së fundi me liqenin e Butrintit në veri dhe në lindje, ku pamja mbyllet nga vargu i lartë i kodrave të Milesë.

HISTORIA DHE LEGJENDAT

Butrinti përmendet për herë të parë nga Hekateu, gjeograf i shek. VI para Kr. Nga gërmimet arkeologjike rezultoi se vendbanimi i përmendur nga Hekateu ishte ngritur mbi terrenin shkëmbor të Akropolit dhe datohet në shek. VIII para Kr. Për themelimin e Butrintit bën fjalë edhe legjenda e përfshirë në veprën e Virgjilit “Eneida”, ku themeluesi i tij përcaktohet Eleni, bir i mbretit të Trojës, i sjellë si rob në këtë qytet. Po kështu Teukri (shek. I para Kr.) ja atribuon Elenit themelimin e qytetit, i cili, pasi arriti në brigjet e Epirit, vendosi t’u bënte fli perëndive një ka. Kau që u caktua për këtë qëllim, posa mori goditjen e parë, u hodh në ujë dhe pasi notoi për disa kohë nëpër një gji deti, arriti në breg, dhe këtu, i plagosur sic ishte, ra e nuk jetoi më. Këtë ngjarje Eleni e mori si një këshillë të perëndive, për të themeluar një qytet në këtë vend, të cilin e quajti në kujtim të kësaj ngjarje Buthrotos. Vendosja e kolonëve trojanë në Epir, pas shkatërrimit të qytetit të tyre, ka qenë një ide mjaft e përhapur në kohën antike.

Butrinti pati kohën e lulëzimit të tij si qytet në periudhën antike në shekujt IV-III para Kr., gjë që reflektohet dhe në monumentet e shumta të kësaj periudhe. Në shek. II para Kr. Butrinti gëzonte të drejtën e një “Municipio”, ndërsa në vitet e fundit të jetës së Cesarit, me vendosjen e veteraneve, Butrinti mori statusin e një kolonie. Augusti vendos në Butrint një valë të re veteranesh dhe civilësh, gjë që kuptohet nga monedhat e prera në qytet me mbishkrimin “*Colonia Augusta Buthrotum*” si dhe “*Colonia Julia Augusta*”. Në këtë kohë Butrinti kishte rëndësi të veçantë strategjike për zotërimin e kanalit të Korfuzit. “Anti është për Romën ai që Buthroti është për Korkyrën”, janë fjalët e Ciceronit drejtuar Pompon Atikut.

Në shekujt III-IV qyteti shënohet në itinerare të ndryshme rrugore, ndërsa në vitin 458 si qendër peshkopate nën juridiksionin e Nikopolit. Në vitin 516 Butrinti është përsëri qendër peshkopate. Në vitin 551 Totila, duke kaluar nga Italia në Korfuz, shkatërroi qytetet epirote që rrethonin Butrintin. Në prag të mesjetës së hershme Butrinti kishte mbetur e vetmja qendër e rëndësishme e krahinës, kur Onchesmos (Saranda) dhe Foinike nuk përmenden më. Në vitin 625, duke u mbështetur në të dhëna indirekte, supozohet ekzistenca e peshkopatës së Butrintit. Ai përmendet përsëri në fund të shekullit IX dhe në vitet e para të shekullit X. Nën sundimin e Johan Cimiskës figuron qendër peshkopate e varur nga Nikopolis. Një repart nga Butrinti mer pjesë në luftë kundër normandëve që udhëhiqeshin nga Bohemundi në vitin 1081. Në vitin 1084 shërben si bazë e Normandëve për pushtimet e tyre të mëtejshme. Gjatë shek. XII ishte bazë e rëndësishme ushtarako-detare bizantine dhe kryeurë për pushtimin e Korfuzit. Udhëtari arab Al- Idrisi e përmend Butrintin (1185) si një qytet të vogël të populluar mirë dhe me treg.

Pas shkatërrimit të Perandorisë Bizantine nga Kryqëzata e katërt (1204), Butrinti u përfshi në Despotatin e Epirit. Më 1258 ai bie në dorë të mbretit të Sicilisë Manfred Hohenstaufen, i dhënë si prikë për të bijën Helena nga despoti i Epirit Mihali II. Më vonë Butrinti rezulton në vartësi të perandorit të Bizantit Mihali VIII Paleologu, i cili vendos atje më 1274 një garnizon të fortë ushtarak. Në vitin 1279 despoti i Epirit Niqifori ia dorëzon Butrintin mbretit të Napolit Karlit I Anzhu. Kështu me disa ndërprerje Butrinti mbeti deri në vitin 1386 nën sundimin e princave të shumtë të shtëpisë së Anzhuve. Që nga koha e sundimit anzhuin Butrinti u lidh përfundimisht me Korfuzin. Ky pozicion përcaktohet qartë në dokumentet anzhutine të kohës, në të cilat përmendet “Kështjella e Butrintit në Korfuz”. Nga viti 1386 deri më 17 tetor 1796, kur u nënshkrua traktati i Kampoformios, i cili shënoi likuidimin e Republikës së Venedikut, Butrinti qëndroi nën sundimin venecian. Pas likuidimit të Republikës së Venedikut Butrinti u okupua për pak kohë nga trupat franceze të Napoleon Buonapartit. Në vitin 1797 Ali pahë Tepelena, pushton Butrintin dhe e mban atë deri në vitin 1820.

MONUMENTET

Muret rrethuese të qytetit

Në sipërfaqen prej 16 ha, që zinte dikur qyteti i fortifikuar i Butrintit, hetohet një mori muresh mbrojtëse të teknikave dhe epokave të ndryshme, të cilat ndërthuren, duke krijuar ndarje të shumta apo mbivendosje, atje ku themelet kanë qenë të barasvlershme për të gjitha epokat.

Nga fortifikimet më të hershme të Butrintit, të shekujve VII-IV para Kr. ruhen disa trakte muresh me blloqe gurësh të papunuara dhe me blloqe poligonale me përmasa të mëdha.

Lulëzimin më të madh, Butrinti dhe fortifikimet e tij e patën gjatë periudhës helenistike, (fundi i shek. IV-shek. III para Kr.). Muret mbrojtëse rrethonin qytetin e sipërm, që zinte një sipërfaqe prej 4 ha, ndërsa më vonë kemi një zgjerim të fortifikimit nga ana jugore në pjesën fushore, brenda të cilit përfshihej qendra shoqërore e qytetit: ndërtesa të rëndësishme, teatri, tempuj, si dhe santuari i Asklepit.

Por pjesa më madhështore e fortifikimeve mbetet sidoqoftë ajo që përfaqësohet nga muri, i cili ndjek lakoren e liqenit nga ana lindore dhe veriore, ku blloqet masive të gurëve me forma trapezoidale dhe drejtkëndëshe, me faqet e tyre të fryra dhe të punuara ashpër me çekiç dhe formulimin arkitektonik të

hyrjeve, synojnë të krijojnë përshtypjen e qëndrueshmërisë dhe monumentalitetit. Rrethanat historike, stili dhe teknika e ndërtimit si dhe elemente të veçanta konstruktivo-arkitektonike, i datojnë këto ndërtime mbrojtëse në periudhën e sundimit të Pirros së Epirit, në fillim të shek. III para Kr.

Qyteti antik përshkohej prej shtatë hyrjesh, nga të cilat vetëm tre ruajnë elemente të rëndësishme të konstruksionit dhe arkitekturës së tyre. Porta e parë e ruajtur, që ndeshet gjatë lëvizjes për të vizituar muret antike të qytetit, është “Porta me Kulla”, e emërtuar në këtë mënyrë nga që është e vetmja portë në Butrint e mbrojtur nga kullat. Korridori i hyrjes mbrohet me dy kulla anësore dhe është i pajisur me një portë të dyfishtë, prej të cilave e para është një “*portë culis*”. Porta me kulla dhe muri në lindje të saj datohen nga fundi i shek. III para Kr., deri rreth mesit të shek. II para Kr. “Porta Skea” ndodhet në anën lindore të murit rrethues të qytetit. Është një portë e tipit ballor me korridor të mbuluar. Krahu i majtë i portës mbrohet nga një dalje e murit rrethues që bie në anën e pa mbrojtur me mburojë të sulmuesit. Një portë tjetër e ruajtur mirë është “Porta e Luanit”. Balli i portës i takon një periudhe të mëvonshme ndërtimi (shek. I, periudha e Augustit). Në këtë periudhë është përdorur si arkitra një bllok i madh muri monolit, mbi të cilin është gdhendur në reliev të ulët një luan që shqyen kokën e një kau. Relievi është frymëzuar nga një skenë arkaike e artit grek.

Vendosja e kolonëve në kohën e Cezarit dhe Augustit kushtëzuan dhe ndërmarrjen e ndërtimeve mbrojtëse në Butrint, duke e bërë atë të jetë nga të pakta qytete në territorin e Shqipërisë që u fortifikuan në këtë periudhë. Këto fortifikime, duke gjykuar nga traktet dhe gjurmët e ruajtura, u përqendruan në qytetin e sipërm, si dhe në murin që rrethonte pjesën e sheshtë të terrenit, në rrëzë të anës jugore të kodrës. Këto ndërtime mund t’i ndajmë në dy periudha kryesore. Fortifikime të periudhës së Cesarit dhe ato të Oktavian Augustit, ndërtime që kapin një hark kohor nga mesi i shek. I para Kr., deri në fillim të shek. I pas Kr.

Në antikitetin e vonë, në shek. V, muri rrethues u shtri deri në bregun verior të kanalit të Vivarit, duke zgjeruar sipërfaqen e mbrojtur të qytetit në 16 ha. Nga gjurmët e ruajtura del se muri ishte pajisur me kulla drejtkëndëshe dhe në formë U-je. Në kohën e Justinianit I (527-565), u rindërtua një trakt muri prej rreth 8 m në anën veriore të qytetit.. Në shek. IX pati një rindërtim të murit që kalonte përgjatë bregut verior të kanalit të Vivarit. Ndoshta në shekullin X u rrethua me mure të pajisura me kulla trekëndëshe dhe kontraforta pjesa më e lartë e kodrës, me një gjatësi prej 280 m dhe gjerësi 70 m, të cilën e kemi quajtur Akropoli.

Rindërtime masive të mureve dhe ngritje muresh të reja pati dhe në kohën e despotatit të Epirit, gjatë shekullit XIII. Në pjesën më të lartë të kodrës u veçua një pjesë nga Akropoli dhe u ndërtua një kështjellë me një donzhon nga despoti i Epirit Mihali II, në vitin 1236. Punimet e fundit të kësaj kështjelle u përkasin venecianëve dhe duhet të jenë kryer gjatë shek. XV. Veneciane është dhe një kullë e veçuar, e ndërtuar në fillim të shekullit XVIII, mbi murin krejtësisht të rrënuar mesjetar buzë kanalit të Vivarit.

TEMPUJT

Në qytetin antik të Butrintit janë zbuluar deri më sot dy tempuj. Më i vjetri prej tyre është tempulli i Asklepit, i ndërtuar në shek. IV para Kr. Ai përbënte objektin qendror të zonës religjioze të qytetit. Brenda tij përfshihej shpella e shenjtë, pranë së cilës buronte uji. Tempulli është i tipit me ante me dy kolona dorike

ne fasadën ballore. Nga faza e parë ruhet bazamenti i stilobatit dhe shtresa e dyshemesë me pllaka guri drejtkëndëshe. Në një fazë të mëvonshme ai u mbulua me qemer cilindrik. Në hyrje të tempullit ruhen bazamentet e disa altarëve, ndërsa në brendësi, gjurmë bazamentesh të disa statujave që ruhen sot në muze. Në veri të tempullit të Asklepit ndodhen gjurmët e tempullit të Afroditës, i ndërtuar në fillim të shek. III para Kr. Fasada e tij ballore kishte katër kolona jonike. Në periudhën romake mbi dyshemenë origjinale ishin shtruar, në kohë të ndryshme, dy shtresa mozaiku, nga të cilat, shtresa e dytë, e papërfunduar, paraqiste motive gjeometrike shumëngjyrëshe.

TEATRI

Teatri është ndërtuar në gjysmën e parë të shek. III para Kr. Teatri ka kaluar ndërmjet dy fazave ndërtimore, ajo e shek. III para Kr. dhe e periudhës romake. Nga faza e parë ruhen mirë shkallarja (*Cavea*) dhe *orquestra*, e shtruar me pllaka të mëdha guri. Pjesët anësore të shkallares mbështeteshin në mure të fuqishme, të ndërtuara me blloqe masive gurësh të përforcuara nga kontraforta. Në periudhën romake teatri ruajti të njëjtin funksion, por ndërtimi i skenës së re fshehu mjaft nga gjurmët origjinale të skenës helenistike. Skena romake e veshur me mermer, zbkurohej nga shtatore, që përsërisnin modelet artit antik grek dhe vendoseshin nëpër nike të ndërtuara posaçërisht për to. Në periudhën romake shkallarja zvogëlohet. Numri i shkallëve të diazomës së sipërme reduktohet në 7 radhë, nga 8 që ishte në periudhën helenistike, ndërsa ato të diazomës së poshtme mbetën të pandryshuara në 12 radhë. Kapaciteti i teatrit në periudhën helenistike ishte llogaritur për 1440 spektatorë, ndërsa në periudhën romake numri i tyre u reduktua në 1130. Duke gjykuar nga teknika e ndërtimit rindërtimi i teatrit u realizua në shek. I.

BANJAT PUBLIKE

Banjat publike kanë qenë të shumta në Butrint, por deri tani janë gërmuar vetëm tre prej tyre, të cilat nuk janë zbuluar tërësisht. Njëra nga banjat, e cila ndodhet pranë Portës me kulla, përbëhet nga dy ambiente.

Banja, që ndodhet pranë kanalit të Vivarit, ka një skemë funksionale më të ndërlikuar. Sallat e banjës parapriheshin nga një vestibul të shtruar me mozaikë me motive gjeometrike, i cili shërbente si sallë zhveshje (*apodyterium*). Që këtej kalohej në sallën qendrore në formë ortogonale në plan, të pajisur me një basen. Rreth sallës qendrore grupoheshin kthina të tjera të pajisura me instalime ngrohjeje.

Banja e tretë, më e madhe nga dy të parat, ndodhet pranë portës së Luanit. Ajo përbëhet nga një sallë e madhe që shërbente për banjë me ujë të ftohtë (*frigidarium*), e shtruar me mozaikë bardhë e zi, si dhe nga pesë kthina më të vogla dhe nga furra, që i furnizonte këto kthina me avull. Rreth shek. V, banja u transformua në varrezë.

NDËRTIMET HIDRAULIKE

Në Butrint ruhen rrënojat e disa çezmave monumentale, puse si dhe rrënojat e një akuedukti. Më të rëndësishmet prej tyre janë: Nymfeu, pusi pranë Portës së Luanit dhe Ujësjellësi.

Nymfeu ndodhet pranë “Portës me kulla”. Ai është ndërtuar krejtësisht me tulla dhe përbëhet nga një vaskë gjysmë rrethore që ka në shpinë një mur të lartë, në të cilin ndodhen tre nike ku vendoseshin skulpturat. Në tre nga anët e tij ndërtimi rrethohej nga një kunetë, e cila mblidhte ujin që vinte nga një ujësjellës, që përfundonte në murin e mbrapsëm të monumentit Ndërtesa ka qenë e veshur nga jashtë me pllaka të bardha

mermeri, ndërsa pjesa e brendshme e basenit, me mermer shumëngjyrësh. Nymfeu duhet të jetë ndërtuar rreth shek II pas Kr.

Pusi pranë “Portës së Luanit” na paraqitet si një ndërtim mjaft interesant. Në këtë vend ka ekzistuar dikur një burim natyror. Rreth shek. III para Kr. u sistemua në një pus të ndërtuar nga dora e njeriut. Në gjendjen aktuale pusi mbulohet nga një nike e lartë dhe e gjerë që qëndron mbi një parapet prej blloqesh të mëdhenj guri, e ndërtuar rreth fillimit të shek. II pas Kr. Ruhen ende gjurmët e një pikturë që paraqesin dy palloj që qëndrojnë në anët e një vazojë. Nga një mbishkrim greqisht, i gdhendur në gurët e parapetit, kuptohet se një farë Giunia Rufina, e cila deklarohet si mikeshë e nimfeve, ka qenë sponsorizuese e këtij ndërtimi.

Ujësjellësi i Butrintit është ndërtuar në kohën e sundimit të Oktavian Augustit, në fillim të shek. I pas Kr. Ky ndërtim pasqyrohet dhe në monedhën e parë që preu ky qytet në historinë e tij. Ujësjellësi niste në fshati Xarë, ku gjenden burime të shumta uji të pastër, përshkonte fushën e Vrinës (Kestrina antike) në një gjatësi rreth 3 km dhe futej në qytet nëpërmjet një ure që kapërcente kanalin e Vivarit. Këmbët e ujësjellësit të vendosura çdo 3.30 m largësi, lidheshin në pjesën e sipërme me harqe tullash.

GJIMNAZI

Kompleksi ndërtimor, i përcaktuar si një Gimnasium, ndodhet në anën e jashtme të murit antik të poshtëm në afërsi të “Portës me kulla”. Kompleksi përbëhet nga një sallë qendrore me formë planimetrike drejtkëndëshe që ka një sërë ambientesh të grupuara rreth saj, të cilat, bashkë me sallën qendrore, formonin një njësi të vetme arkitektonike. Salla qendrore përfundon me një apsidë në mesin e murit lindor, ndërsa në qendër të sallës ndodhet një nymfe i vogël, i veshur dikur me pllaka mermeri. Në murin lindor të nymfeut ndodhen tre nike apsidale, që shërbenin për vendosjen e skulpturave. Pjesa e sipërme e tyre ka qenë zbukuruar me mozaikë shumëngjyrësh, që paraqisnin vazo të tipeve të ndryshme. Nymfeu kishte dhe një basen që furnizohej me ujë nëpërmjet kanaleve që përshkonin niket.

RRËNOJAT E PALLATIT BIZANTIN

Rrënojat e pallatit bizantin, të pa gërmuara tërësisht, janë konsideruar, që nga koha e zbulimit të parë të këtyre rrënojave në vitin 1928, si një kishë e martirëve kushtuar Shën Terinos. Gërmimet arkeologjike të viteve të fundit të organizuara nga shkolla britanike në Romë dhe Fondacioni Butrinti, në bashkëpunim dhe me Institutin Arkeologjisë në Tiranë, bënë të mundur zbulimin e plotë të këtij kompleksi dhe një interpretim të ri të tij. Pallati shtrihej buzë kanalit të Vivarit dhe qe organizuar rreth një hapësire qendrore. Salla e pritjes kishte formë tri apsidale. Nike të vogla që shërbenin për vendosjen e skulpturave ndodhen në muret e brendshme të hapësirave. Dhoma të tjera më të vogla komunikonin me sallën trikonkëshe. Pallati është interpretuar si një qendër rezidenciale e peshkopit me një zgjidhje të veçantë arkitektonike për shkak të kushteve të terrenit disponibël. Pallati është ndërtuar në disa faza mbi bazën e një plani të parastudiuar. Koha më e mundshme e ndërtimit të tij është gjysma e parë e shek. VI.

GURËT ME MBISHKRIME

Disa mbishkrime që bëjnë fjalë kryesisht për lirim skllëvërisht janë gdhendur në pesë radhë gurësh në analemën e teatrit. Por shumica prej tyre u zbuluan gjatë gërmimeve të viteve 1976-77 në një kullë drejtkëndëshe në murin rrethues antik të qytetit të poshtëm. Për të shmangur dëmtimin e më tejshëm dhe

për qëllime studimi, kulla u çmontua dhe blloqet me mbishkrime u rreshtuan në formën e një muri në një vend të përshtatshëm në afërsi të kullës. Blloqet me mbishkrime që u përdorën për ndërtimin e kullës ishin marrë nga një ndërtesë tjetër më e vjetër, funksioni dhe vendndodhja e së cilës janë të panjohura. Mbishkrimet përshijnë periudhën nga mesi i shek. II deri në mesin e shek. I para Kr.

HISTORIKU I GËRMIMEVE ARKEOLOGJIKE DHE I RESTAURIMEVE

Gërmimet arkeologjike sistematike në Butrint filluan në vitin 1926 nga Misioni Arkeologjik Italian i kryesuar nga arkeologu L.M. Ugolini, i cili i vazhdoi gërmimet deri në vitin 1937. Rezultat i këtyre gërmimeve intensive dhe shumëvjeçare janë tërësia e monumete që shihen sot në Butrint. Gërmimet u vazhduan në një masë të kufizuar nga arkeologu Dh. Budina në vitet '50, i cili u përqendrua në nekropolin e Butrintit, i cili shtrihej jashtë mureve rrethuese si dhe në gërmimin e ujësjellësit që përshkonte fushën e Vrinës. Gërmimet dhe restaurimet kanë vazhduar deri në ditët e sotme, duke zbuluar dhe shumë monumete të rëndësishme.

Në vitin 1992, **Butrinti** u përfshi në Listën e Trashëgimisë Botërore të UNESCO-s,

LITERATURA

Ugolini, L.M., *Il mito d' Enea, Gli scavi*, Roma, 1937

Ugolini, L.M., *L' Acropoli di Butrinto*, Roma 1942

Hammond, N.G.L., *Epirus*, Oxford, 1964

Budina, Dh., “Nekropoli i Butrintit”, *BUSht (Shkencat shoqërore)*, 1959

Budina, Dh., “Ujësjellësi i Butrintit”, *Studime Historike* 2, 1967.

Zheku, K., “Restaurimi i Portës së Luanit, Butrint”, *Monumentet* 1, 1970.

Pani, G., “Restaurimi i Portës me Kulla në Butrint”, *Monumentet* 11, 1976.

Lako, K., “Gërmime në Butrint”, *Iliria*, VII-VIII, 1977-78

Ceka, N., “Fortifikimi antik i Butrintit dhe i territorit të Prasaibëve” *Monumentet* 12, 1976.

Meksi, A. “Bazilika e madhe e Butrintit”, *Mjeshtrit dhe arkitektura popullore*, Tiranë 1976.

Karaiskaj, Gj., *Butrinti dhe fortifikimet e tij*, Tiranë 1984.

Hodges, R., Saraçi, G., Bowden, W. Etal, “Late-antique and Byzantine Butrint”, *Journal of Roman Archaeology* 10, 1997, f. 207-34.

Martin, S., *Plani i menaxhimit të Butrintit 2000-2005*, Londër 2001.




Teatri



Porta me kulla





Porta Skea



Porta e Luanit



Termet (banjot)



Nimfeu





3. BYLISI

VENDODHJA DHE PEISAZHI GJEOGRAFIK

Bylisi ndodhet mbi fshatin Hekal në afërsi të qytetit të Ballshit. Pllaja, mbi të cilën ngrihet qyteti antik i Bylisit, është mjaft e përshtatshme për shtrirjen e një qyteti të madh për periudhën antike. Këtë e tregojnë gjurmët e mureve antike, që rrethonin një sipërfaqe prej 32 ha, duke lënë jashtë tyre ende vende të përshtatshme për zgjerimin e vendbanimit. Nga skajet e vendbanimit zotërohet një pamje mjaft e gjerë e një peizazhi mjaft tërheqës. Në njërën anë zotërohet terreni i valëzuar i kodrave të Mallakastrës dhe, në anën tjetër, lugina piktoreske e lumit Vjosa, që humbet në drejtim të detit. Është vështirë të gjesh në këtë zonë një vend më të përshtatshëm për ngritjen e një qyteti të antikitetit. Jo më kot Bylisi është një nga qendrat më të rëndësishme arkeologjike të Shqipërisë, krahas Apollonisë dhe Butrintit.

HISTORIA

Emëri i Bylisit si qytet shfaqet vonë në burimet historike, megjithëse si bashkësi territoriale bylinët dalin herët në skenën e historisë. Sipas Pseudo-Skylaksit, i cili përshkroi bregdetin Adriatik dhe Jon rreth vitit 380 para Kr., ata ishin ilirë bashkë me amantët. Ai shkruante se: “Oriket banojnë në krahinën e Amantisë, amantët që shtrihen deri këtu janë ilirë nga bylinët”.

Për herë të parë emri i qytetit del në trajtën Bulis, në ngjarjet e viteve 49-48 para Kr., kur qyteti iu dorëzua Cezarit dhe shërbeu si bazë për furnizimin e ushtrisë së tij. Më tej Ciceroni njoftonte senatin romake, se Bylisi ishte pushtuar nga njerëzit e Mark Antonit. Një shekull më vonë Plini e përmend Bylisin si koloni romake, ndërsa Ptolemeu në shek. II, si dhe Hierokli në shek. e VI, e shënojnë si një nga qytetet kryesore të Ilirisë.

Më tepër se sa nga të dhënat e shkrimtarëve antikë, historia e Bylisit mund të pasurohet nga monumentet e zbuluara, si dhe nga të dhënat që sjellin mbishkrimet e gjetura në Bylis apo në zonën rreth tij. Lulëzimin e tij më të madh Bylisi e pati rreth mesit të shek. III para Kr., kur Koinoni i Bylinëve ishte një krahinë e lulëzuar dhe kryeqendra e tij, Bylisi, mori pamjen e një qyteti bashkëkohor. Në këtë periudhë përfundoi ndërtimi i Agorasë me teatrin, stoon, stadiumin, gjimnazin, tempujt si dhe ndërtesa të tjera. Lagjet u zhvilluan sipas sistemit ortogonal, të njohur si sistemi hipodamik.

Pas luftës së fundit iliro-romake Bylinët nuk përmenden më në burimet e shkruara. Vendbanimet e tyre u braktisën, ndërsa Bylisi mbijetoi dhe u rindërtua në periudhën kur ai u kthye në koloni romake, në vitet e para të sundimit të Augustit. Kjo dëshmohet nga disa mbishkrime latine të gjetura në Bylis, që e cilësojnë qytetin si: *Colonia Iulia Augusta*. Një numër mbishkrimesh, që lidhen me ndërtime apo ngritje statujash, i përkasin sundimit të perandorëve August, Vespasian, Hadrian dhe Antonin Piu. Koinoni i Bylinëve preu monedhat e tij që nga viti 270 deri në vitin 167 para Kr., por me emrin e qytetit Bylis, monedhat u prenë vetëm në periudhën romake.

Në vitin 431 përmendet peshkopi Feliks i Apollonisë dhe i Bylisit, ndërsa në vitin 458 Bylisi kishte një peshkop të vetin (Philocarus, episcopus Ballidi), që dëshmon që qyteti ishte bërë qendër peshkopate. Edhe pse qyteti u rifortifikua në periudhën e Justinianit, siç del nga një mbishkrim i gjetur në Bylis, (nuk

ankohem më për barbarët, nuk i frikësohem më, sepse gjeta tek Viktorini i madh një njeri që më ndërtoi me duart e tij), ai nuk i shpëtoi shkatërrimit nga sllavët në vitin 586, i cili bëri që Bylisi të braktisej përfundimisht. Pas kësaj selia e peshkopatës u shpërngul në Ballsh.

FORTIFIKIMET

Muret mbrojtëse të antikitetit rrethonin një sipërfaqe prej 30 ha dhe kishin një gjatësi prej 2250 m. Vetëm një pjesë shkëmbore rreth 200 m ka mbetur pa u fortifikuar pasi mbrojtja natyrore ishte e mjaftueshme. Muri përforcohet nga pak kulla drejtkëndëshe në raport me gjatësinë e tij. Në murin lindor ndodhen vetëm tre kulla ndërsa katër të tjera janë shpërndarë në muret e tjerë. Në planimetrinë e mureve mbizotërojnë kthesat kënddrejtë, të cilat i gjejmë kudo. Hyrjet janë tangenciale dhe përshkojnë katet e poshtme të kullave, të cilat kanë qenë të mbuluara me qemerë cilindrikë. Deri tani janë zbuluar gjashtë hyrje. Teknika e ndërtimit është izodomike me blloqe gurësh gëlqerorë të punuara rrafsh. Faqet e jashtme të murit lidhen në brendësi nga blloqe gurësh të vendosur tërthor. Po të gjykojmë nga elementet përbërëse të planimetrisë, nga teknika e ndërtimit dhe formulimi i hyrjeve, fortifikimi duhet të jetë ndërtuar në periudhën helenistike, ndoshta nga fundi i shek. IV – fillimi i shek. III para Kr.

Muret u riparuan në fillim të shek. V, ndërsa në kohën e sundimit të Justinianit I u ndërtua një fortifikim i ri brenda të parit, që e reduktonte sipërfaqen e qytetit në një të tretën e asaj fillestare. Sipas teksteve të mbishkrimeve për këtë vepër u përkujdes Viktorini.

MONUMENTET

Agoraja

Nga Agoraja e dikurshme janë ruajtur vetëm gjurmë të zbehta. Ajo është ndërtuar rreth mesit të shek. III para Kr. dhe përfshinte në një ansambël të vetëm harmonik, teatrin, stoat, stadiumin, gjimnazin dhe ndërtime të tjera publike. Agoraja ka formën e një katërkëndëshi dhe ka qenë vendosur në pjesën jugperëndimore të qytetit, pranë njërës nga hyrjet e tij, për të lehtësuar qarkullimin e banorëve që vinin nga zonat përreth. Monumentet ishin vendosur në dy rrafshje me lartësi të ndryshme. Hapësira e agorasë ndahej nga qyteti nga një mur dekorativ si dhe nga muret e stoas së madhe. Dy porta monumentale shërbenin për hyrjen e qytetarëve nga kjo anë.

Agoraja e ruajti rolin e saj si qendër publike edhe në periudhën e kolonisë romake kur u kthye në forum. Gjatë kësaj kohe u rindërtua teatri dhe u ndërtuan disa monumente të tjera, siç e dëshmojnë mbishkrimet e kohës.

Teatri

Nga teatri janë ruajtur vetëm pak elemente, pasi gurët e tij janë përdorur gjerësisht për ndërtimet e mëvonshme, kryesisht në murin rrethues dhe në termat e periudhës së Justinianit në shek. VI. Nga teatri ruhet forma e shkallares në trajtën e një gjysmë rrethi me diametër 78 m, forma e orkestrës me gjurmët e kanalit të tij kullues, si dhe rrënoja të ulëta të proskenës dhe skenës. Shkallarja kishte 40 radhë dhe mund të mbante 7500 spektatorë.

Stadiumi

Ndryshe nga stadiumet e tjerë të antikitetit, stadiumi i Bylisit është ndërtuar vetëm në njërin krah, duke shfrytëzuar pjerrësinë e terrenit. Madje ai ka një gjatësi të shkallares vetëm 134 m, nga 190 m që ishte gjatësia standarte e stadioneve, por pista zgjatej në madhësinë e duhur në drejtim të teatrit. Në krahun verior të shkallares u ndërtua një sterë gjigande uji me gjatësi rreth 60 m dhe gjerësi 4,5 m. Stera u përdor deri në periudhën e Justinianit, kur pranë saj u ngrit edhe një banjë publike. Në këtë pjesë ruhen më mirë dhe shkallët e stadiumit, që përbëhen nga 19 radhë dhe janë ndërtuar me blloqe gurësh gëlqeror drejtkëndësh. Stadiumi u ndërtua si pjesë e agorasë në mesin e shek. III para Kr.

Gjimnazi

Gjimnazi bënte pjesë në kompleksin arkitektonik të agorasë. Ka pasur një planimetri katërkëndëshe me radhë ambientesh që zhvillohen rreth një oborri të brendshëm. Gjimnazi u ndërtua në gjysmën e dytë të shek. III para Kr. me blloqe drejtkëndëshe që ruhen vetëm në nivelin e themelit. Në periudhën e kolonisë romake ai u shkatërrua dhe mbi të u ndërtuan termat.

Stoat

Në Bylis janë ndërtuar dy stoa, stoa e madhe dhe stoa e teatrit. Prej tyre ruhen vetëm gjurmë të pakta. Stoa e madhe, e ndërtuar në çerekun e dytë të shekullit III-të p.K. ndante agoranë nga zona e banuar e qytetit. Ajo është ndërtuar në formën e shkronjës L me një gjatësi të përgjithshme prej 144 m.

Stoa ka qenë dy katesh me mbivendosjen e kolonadës jonike mbi atë dorike në fasadë. Të dy katet e saj ishin të ndara edhe nga një rresht tjetër kolonash. Përpara stoas janë gjetur disa bazamente, të cilat, si dhe tek teatri, shërbenin për ngritjen e statujave. Disa pjesë të stoas janë rindërtuar edhe në periudhën romake, ndërsa në shek. e III-të ajo u shkatërrua dhe në pjesën lindore të saj u ndërtua një faltore e vogël kushtuar Eskulapit. Në shek. V-të në pjesën perëndimore të stoas u ngrit bazilika A, ndërsa pjesa tjetër u shfrytëzua për ndërtimin e banesave.

Stoa tjetër ka qenë ndërtuar në krah të teatrit përgjatë murit rrethues. Ajo ishte një ndërtesë dy katesh me gjatësi 60 m dhe gjerësi 11,40 m. Shpinën e saj e përbënte muri rrethues. Kjo stoa shërbente për qëndrimin e spektatorëve që vinin për të parë shfaqjet në teatër, të cilat zgjasnin disa ditë, për t'u çlodhur, për të ngrënë apo për t'u strehuar në apsidat e saj. Këtu u gjetën rrënojat e një furre të shek. e VI-të, e cila shërbente për kthimin në gëlqere të statujave dhe mbishkrimeve të agorasë.

Bazilikat

Monumentet më të rëndësishme për sa i përket ruajtjes së tyre dhe vlerave të mozaikëve janë bazilikat paleokristiane. Në qytet janë zbuluar deri tani 7 bazilika, prej të cilave 4 ndodhen brenda murit rrethues të periudhës së Justinianit, ndërsa të tjerat jashtë rrethimit.

Mbishkrimi i Mark Lolianit

Një mbishkrim latin i zbuluar bën fjalë për ndërtimin e një rruge nga një qytetar romak i Bylisit, quajtur Mark Loliani, i cili pati shërbyer në ushtrinë romake. Me dekret të dekurionëve dhe me shpenzimet e veta Loliani pati ndërtuar një rrugë për karroca që të çonte nga kolonia e Bylisit për në Astacia, duke kaluar nëpër vende të thyera dhe të rrezikshme dhe që kalonte me një urë lumin Argias. Gjurmët e rrugës dhe të urës nuk janë identifikuar deri tani. Mbishkrimi mendohet të jetë shkruar rreth vitit 150.

LITERATURA

Baçe, A., Ceka, N., “Shëtitoret e periudhës qytetare ilire”, *Monumentet* 22, 1981

Muçaj, S., “Dy monumente të antikitetit të vonë në Bylis”, *Iliria* XV(1986),1

Anamali, S., “Katër mbishkrime ndërtimi nga Bylisi”, *Monumentet* 1(33), 1987

Muçaj, S., “Bazilika A e Bylisit, *Iliria* XVII(1987), 1

Meksi, A., Arkitektura paleokristiane në Shqipëri, “*Monumentet*” 2(30), 1985,

Muçaj, S., “Sistemi fortifikues i qytetit të Bylisit në Antikitetin e vonë”, *Iliria* XX, 1990

Karaiskaj, Gj., *5000 vjet fortifikime në Shqipëri*, Tiranë, 1981.

Ceka, N., Muçaj, S., *Bylisi*, Tiranë 2004



Pamje e luginës së Vjosës



Fragment nga muri rrethues



Teatri



Agoraja

4. DURRËSI (*DYRRHACHION, DYRRACHIUM, EPIDAMNOS, EPIDAMNUS*)

HISTORIA

Qyteti i Durrësit është themeluar në vitin 627 p.Kr. nga kolonistë të ardhur nga Korinti dhe Korkyra. Por, sipas autorëve antikë Dion Kasi dhe Stefan Bizantini, para kësaj date themelimi, këtu ka qenë një qendër, krijuar nga mbreti ilir Dyrrah dhe nipi i tij Epidamni, i cili u ndihmua nga Herakliu në luftën për pushtet kundër vëllezërve të tij.

Që nga themelimi i tij e deri në vitin 229, kur u pushtua nga romakët, Dyrrahu ka qenë një qytet –shtet i qeverisur sipas modelit të një polisi antik, me përjashtim të periudhës 312-270 p. Kr, kur u sundua nga mbretërit ilirë Glaukia, Monun dhe Mytil. Aristoteli përmend kushtetutën e Dyrrahut, që siguronte një qeverisje më demokratike se ajo e Apollonisë. Qyteti kishte nëpunës të zgjedhur çdo vit dhe kishte monedhat e veta prej argjendi e bronzit. Romakët e lanë në fuqi këtë sistem vetëqeverisjeje deri në vitin 30 p.Kr., kur qyteti u kthye në koloni romake me urdhër të Augustit. Dyrrahu mbeti një qendër e rëndësishme ekonomike e shoqërore. Në trevën ballkanike, këtu fillonte rruga Egnatia.

Gjatë Mesjetës Dyrrahu u qëndroi dyndjeve shkatërrimtare të popujve dhe mbeti kryeqendra e pushtetit bizantin. Në fillim të shek. IV, në sajë të reformave të Dioklecianit, ai u bë kryeqytet i provincës Epirus Nova (Epiri i Ri) dhe u fortifikua nga perandori Anastas (491-518), me origjinë nga Dyrrahu, me muret, që ruhen edhe sot.

Këtë pozitë, si qendër e një krahine të madhe, Durrësi e mbajti gjatë gjithë Mesjetës. Kështu në fillim të shek. IX ishte kryeqytet i një teme bizantine, që përfshinte pjesën më të madhe të territorit të Shqipërisë. Në shek. XI-XII ishte porti më i rëndësishëm i Perandorisë Bizantine në Perëndim. Në këtë periudhë u pushtua nga normanët, por përsëri u mor nga bizantinët. Në vitin 1279 Karli I Anjou e bëri kryeqytet të Mbretërisë së tij Shqiptare (Regnum Albania). Në vitin 1392 ishte nën venecianët dhe më 1501 u pushtua nga turqit, të cilët e kthyen në një vendqëndrim garnizoni, duke ia humbur rëndësinë dhe shkëlqimin, që kishte pasur gjatë periudhave të mëparshme.

MONUMENTET E QYTETIT

Nga periudha më e lashtë e Dyrrahut njohim pak monumente, për shkak të shkatërrimit apo mbulimit të tyre nga periudhat më të vona. Gjysmës së parë të shek. VI p.Kr. i takojnë terrakotat e një tempulli arkaik, të gjetura në varrezën e sotme të qytetit. Ato i përkasin antablementit prej balte të pjekur, që vishte strukturën e drunjtë të tempullit. Rreth gjysmës shekulli më vonë datohet një altar i zbuluar në kënetën e Durrësit. Ai përbëhet nga një bazament me dy kolona dorike, të cilat mbanin dikur një skulpturë.

Periudha arkaike dhe klasike janë përfaqësuar kryesisht nga monumentet e varreve, të gjetura rastësisht apo gjatë gërmimeve në nekropolin antik, i cili shtrihet në veri të qytetit. Të një cilësie të lartë janë stelat (gurët e varreve) të shek. V-IV p.Kr., të cilat u takojnë prodhimeve atike. Ato dëshmojnë për lidhjet, që kishte krijuar qyteti me Athinën pas Luftës së Peloponezit, të cilat nisën pikërisht në Dyrrah. Enët e prodhimit atikas dhe apulias si dhe imitacionet dyrrahase të tyre, të gjetura në nekropol, dëshmojnë për mirëqenien e qytetit dhe lidhjet e tij tregtare me Athinën gjatë shek. V p.Kr. dhe me Magna Grecia-n (Italinë e Jugut) në shek. IV p.Kr.

Në këtë periudhë Dyrrahu njohu shtrirjen më të madhe. Ai ishte rrethuar me mure, prej të cilave janë zbuluar vetëm pjesë të vogla në veri të qytetit. Monumenti më interesant i kësaj periudhe është një mozaik i shek. IV p.Kr., i quajtur **“Bukuroshja e Dyrrahut”**, cili paraqet kokën e një gruaje të rrethuar me dekoracione bimore. Kjo është edhe koha kur në qytet filluan të priten monedhat prej argjendi, të cilat në fillim kopjuan simbolet e Korintit me Athina/Pegas, dhe më pas të Korkyrës me Lopë me viç/Katrorë.

Periudha helenistike, e cila përmbledh shek. III-II p.Kr., ka qenë gjithashtu kohë e zhvillimit të vrullshëm ekonomik e kulturor të Dyrrahut. Edhe nga kjo periudhë na vijnë kryesisht monumente varresh, qeramikë, si dhe elemente arkitektonike. Mbishkrimet e kësaj periudhe dëshmojnë për shtimin e popullsisë ilire, të favorizuar nga kushtetuta demokratike e Dyrrahut. Në atë kohë mjaft ilirë, të cilët dallohen nga emrat tipikë, si: Boiken, Monun, Nesyl, Skyrtan etj., arritën edhe në funksione të larta të qeverisjes së qytetit.

Vendosja e kolonisë romake gjatë sundimit të Augustit solli ndryshime rrënjësore në ekonominë dhe kulturën e Dyrrahut. Gjuha zyrtare u bë latinishtja, e cila zëvendësoi greqishten në të gjitha mbishkrimet.

Durrësi i Periudhës Romake u zhvillua në të njëjtën hapësirë, rreth skelës dhe në veri të saj, duke trashëguar edhe planin e rregullt urbanistik, me rrugë të orientuara sipas pikave të horizontit. Monumentet më të rëndësishme antike i takojnë pikërisht kësaj periudhe.

Monumenti më i rëndësishëm është **amfiteatri**, gërmimi i të cilit filloi në vitin 1966. Sot është zbuluar rreth një e treta e monumentit, duke saktësuar formën dhe mënyrën e ndërtimit. Ai ka formën tipike të amfiteatrove romake me planimetri eliptike me diametër 136 m., të orientuar në aksin V-J të qytetit. Në ndryshim nga ndërtimet tipike romake, të cilat ngriheshin në një terren të sheshtë, mjeshtërit dyrrahas e kanë mbështetur njërin krah të amfiteatrit në faqen e kodrës, për të kursyer punën dhe materialet. Shkallaret e amfiteatrit ngriheshin mbi arenën deri në lartësinë 25 m dhe kishin kapacitet për 15000 spektatorë. Ato kanë pasur ndenjësë të gurta dhe mbështeteshin mbi një sistem galerish, të ndërtuara me teknikën romake *opus incertum*, një kombinim i muraturës me gurë e breza tullash.

Amfiteatri është ndërtuar në periudhën e sundimit të perandorit Hadrian (117-138 mb.Kr.) dhe ka qenë në përdorim deri kur perandori Teodosi I (379-395) ndaloi lodrat e përgjakshme me gladiatorë. Pas kësaj amfiteatri u përdor si varrezë dhe në shek.VI në njërën nga galeritë perëndimore u ndërtua një **kishë e vogël**.

Është i njohur mozaiku i kësaj kishe, ku paraqitet Shën Maria, mbretëresha e qiellit, në mes të arkangjelyve Mihal dhe Gabriel. Pranë tyre është paraqitur Shën Stefani, si martiri i parë i Kishës, ndërsa në gjunjë, para tyre, ktitori (dhuruesi i kishës) së bashku me gruan e tij. Mbishkrimi, ku lexohet “Mbroje o Zot skllavin tënd, Aleksandrin”, duket se i referohet pikërisht emrit të ktitorit. Mozaiku tjetër nuk është ruajtur mirë dhe paraqiste një skenë me Krishtin në qendër, të rrethuar nga dy engjëj dhe nga dy figura të tjera, që simbolizojnë diturinë (Sofia) dhe paqen (Irimi). Në këmbët e tyre janë paraqitur dy ktitorë të tjerë.

Në periudhën e Hadrianit datohet edhe ndërtimi i **ujësjellësit të Dyrrahut**, i cili sillte ujin e lumit Erzen në qytet. Prej tij ruhen gjurmët e këmbëve të harqeve në kënetën e Durrësit si dhe një tunel me

gjatësi 2,7 km, i cili kalonte poshtë kodrës së Arapajt. Në Muzeun e Durrësit ruhen tuba prej plumbi, që shpërndanin ujin në lagjet e qytetit.

Një monument tjetër të shek. II mb.Kr. përfaqësojnë **termet** (banjat publike), të cilat u zbuluan gjatë ndërtimit të teatrit “Aleksandër Moisiu”. Ambienti më i ruajtur është *tepidari* (salla e ambientimit) me ngrohje poshtë dyshemesë së shtruar me pllaka mermeri bardhë e zi.


Periudhës perandorake romake i takojnë edhe disa mozaikë të zbuluar gjatë hapjes së themeleve të ndërtesave moderne. Më i njohuri është mozaiku, që paraqet *erosët* të hipur mbi kuajt mitologjikë të detit, *hipokampët*.

Për nivelin e lartë artistik dhe begatinë e Dyrrahut dëshmojnë edhe skulpturat ose altaret madhështore prej mermeri.

Monumentet e Periudhës Bizantine janë tregues të qartë të ruajtjes së rëndësisë së Dyrrahut në shek. IV-VI, kur u bë edhe qendër e provincës së Epirit të Ri.

Një monument të rëndësishëm të periudhës së hershme bizantine përfaqëson **rotonda**, një ndërtim rrethor me diametër 40 m. Ai duket se ka qenë një treg i mbyllur me një radhë dyqanesh dhe një peristil shtyllash mermeri rreth një oborri rrethor, ku hyhej nga një portë e vetme, e cila mbyllej natën. Në qendër të oborrit ngrihej një shtatore mbi një bazament të veshur me pllaka mermeri.

Një numër i madh kolonash, kapitelesh dhe pjesësh arkitektonike, të gjetura rastësisht dhe të ekspozuara në Muzeun Arkeologjik të Durrësit, janë dëshmi e monumenteve madhështore ende të pazbuluara, apo të varrosura përgjithmonë nën betonin e asfaltin e qytetit të sotëm.






Muret rrethuese të periudhës së perandor Anastasit



Amfiteatri



Kapela e amfiteatrit



Mozaiiku i kapelēs



Termat (banjë)



Rotonda



Vazo. Muzeu Arkeologjik,



Bukuroshja e Durrësit, mozaik